

MAGNITUDO  
SAPIENTIÆ  
EX IMMENSITATE  
MERCEDIS  
æstimata.  
LAUDATIO PANEGYRICA  
D. THOMÆ  
AQUINATIS,

SANCTISSIMI  
Divinæ Voluntatis INTERPRETIS,  
SAPIENTISSIMI  
ECCLESIAE DOCTORIS,  
*Divinæ Vocis oraculo probati, & Mercede DEO  
Munerati:*

Quam in Basilica S. ADALBERTI Ep. & Mart. SACRI OR-  
DINIS PRÆDICATORUM Wratislaviæ inter Anniversaria ejusdem  
S. Doctoris Solemnia Nonis Martii Anno M. DCC. XXV.  
Pronunciavit

*Reverendus ac Doctissimus Pater*

P. MATHIAS HAYKO, è Soc. JESU,  
AA. LL. & PHILOSOPHIÆ DOCTOR,

In Alma Cæsarea Regiæque Universitate Leopoldina  
Theologiæ Moralis & Linguae Sanctæ Professor Publicus, & Ordina-  
rius, nec non Scholarum Humaniorum Præfectus.

\*\*\*\*\*

Wratislaviæ . Typis Caspari Rudolphi Müller, Electoral.  
& Episcopali. Typograph. Aulic.

*Domus Prof Jac L. G. & Barb*



HONORI AC VENERATIONI  
REVERENDISSIMI

Ac

ILLUSTRISSIMI

*DOMINI DOMINI*

CAROLI JULII

LIBERI BARONIS

De BEECK,

Cathedralis Ecclesiae Wratislaviensis Præ-  
lati Custodis, & Collegiatæ Ecclesiae Sanctæ Crucis  
Canonici, nec non Serenissimi Principis Electoris Trevirensis & Episcopi  
Wratislaviensis Consilarii, & Episcopatus inferioris Circuli  
Aulæ Præfecti;

*DOMINI DOMINI*

Ac

*PATRONI GRATIOSISSIMI.*





REVERENDISSIME

Ac

ILLUSTRISSIME

DOMINE DOMINE.

Mecoenas Gratiofissime.



A<sup>2</sup>
nig-
 Doing Prof. Geo. L. H. B.

A 2



nignitas tua imperavit. Simul enim ac recordatio tui  
animum nostrum subiit; vidimus illico non incomita-  
tum te, sed splendidissimo immortalium decorum fa-  
tellitio incinctum nobis offerri. Vidimus ut latera tua  
stiparent dignitatis celsitudo, Prælati auctoritas, Ju-  
dicis officium, Sapientiæ meritum, in Deum religio,  
in Coelites pietas, in omnes affabilis comitas, Virtu-  
tum denique omnium corona, & celebritas. Hæc  
verò cum singula tanta sint, ut exorari nobis Patro-  
nus posses; omnia fecerunt ut deberes. Non com-  
memorabimus iterum facilitatem, humanitatem, ac  
beneficentiam tuam Reverendissime ac Illustrissime  
Domine. Nec verò Generis tui avitam Nobilitatem  
dignis præconiis efferemus; quòd paginæ hujus angu-  
stia eam non capiant, & unà tecum gloriemur, ube-  
riorem tibi laudum segetem exurgere ex eo, quod ip-  
si tibi, quàm quod laudatissimis Majoribus debes; etsi  
debes plurima. Id autem maximè est tuum, quòd  
nobilissimæ Prosapiæ tuæ plus contulisse videare, quàm  
ei acceptum referas ornamentum. Tibi planè debes Re-  
verendissime ac Illustrissime Domine, quòd Cathedra-  
lis Divi Joannis Baptistæ Ecclesia tibi magnificentissimè  
ornando diu multumque laborarit: & qui ambiri me-  
ruerunt ab aliis, amplissimi honores, ambitione longè  
pulcherrimà te prensarint. Et finis factus esset con-  
tentioni laudatissimæ, si omnes in te confluere, omnes  
se tibi extollendo subicere potuissent: nempe cum  
honores indeptus sis multos, plures mereris. Faustum  
sanè certamen, in quo pro eorum non minùs gloria,  
quàm tua certatum est: nec pro alterutra magis, quàm  
pro



pro felicitate nostra. Atque hæc quidem eò spectant,  
non ut exornemus te meritis laudibus; non enim id  
usquequaque potest stylus noster, nec id compendia-  
ria nuncupatio Panegyrici brevis, quin nec modestia  
tua finit; sed ut liceat inde conjicere, duplicis nobis  
gaudii causam abs te tributam; unam quidem, quòd  
Patronum te nobis maximè volentibus imperâris me-  
ritorum tuorum magnitudine: alteram, quòd Pane-  
gyrico Aquinatis nostri splendore Illustrissimi Nomi-  
nis tui honorem tribuas & gloriam. Nec enim vanè  
existimavimus cum Thoma conventurum optimè  
hunc Panegyricum, & Panegyrico ipsi ingens decus  
atque ornamentum accessurum, si Illustrissimum No-  
men tuum in ejus fronte peroraret: cui, uti & Gentili-  
tio Stemmati tuo meritò inscripserimus: *Et Decus &  
Tutela. Tales stant bellatrices aquilæ.* (a) Talis Leo stat,  
(b) *Largóque serenat igne domum* tuam ac Thomam  
nostrum. Adstat non tam *hominis* forma, quam ipsa  
*humanitas*: quantum hoc *decus*! & erigit vexillum:  
quantum *præsidium*! (c) O & *præsidium & dulce de-  
cus meum*! meritò tibi acclamat Panegyricus, & cum-  
primis obstrictissimum tibi Studium nostrum Genera-  
le. Sed in Leone tuo majus aliquid suspicimus Reve-  
rendissime ac Illustrissime Domine. Custos est prin-  
cipis Ecclesiæ, inque ea ipsa pro ejus ornamento & tu-  
tela excubat; cùm de aliis Leonibus id duntaxat dica-  
tur:

Est *Leo*, sed CUSTOS, oculis quia dormit apertis:

Templorum idcirco ponitur ante fores. (d)

B

Quàm

(a) *Claudian. de Nupt. Honor.* (b) *Statius* i. *Achilleid.* (c) *Horat.* (d) *Alciatus.*



Quàm igitur bellè in *decus* & *præsidium* refulgentem in Gentilitio Stemmata tuo faciem *Hominis*, faciem *Leonis*, & faciem *Aquilæ* cum Aquinatico *Bove* hodie confociamus, & Illustrissimi Stemmatu tui auxilio clarissimum mysticorum animalium quaternionem conficimus. Habe igitur Thomam Doctorem Ecclesiæ, Prælate Custos Ecclesiæ. Habe Reverendissime ac Illustrissime Domine exiguum hoc devinctissimi affectûs nostri monumentum: & bis erit Panegyricus iste tuus; semel quia eum tibi inscribi iussere tua in nos beneficia; iterum, quia tibi inscriptum novo beneficio admisisti. Habe nos demum perpetuò tuos cum Thoma, à quo separari non possumus, & tuos quidem meritis tuis, voluntate, affectu, & felici necessitate nostrâ.

Ità vover  
Devinctissimum Studium  
Generale  
Wratislaviæ ad S. Adalbertum  
Ord. Præd.





## PANEGYRICUS.



I quis fortè mirabitur, Auditores, me qui nullà sum vel ingenii vel facundiæ laude conspicuus, hìc rursus pro rostris apparere, & à gloria Thomæ Angelici semel oppressum, eidem iterum tum scrutandæ tum commendandæ operam dare; cùm Aquinati laudando nè Arpinatem quidem Oratorem suffecturum liquidò compertum omnibus sit: is ità habeat, extra censuram esse, quod non præsumptione animi nec ingenii præfidentiâ, sed majorum imperio fuscipitur: eamque demum esse laudem pulcherrimam, quæ non ab ingenii & orationis præstantia, sed à propensa laudandi voluntate profiscitur. Ego verò ità Thomam demiror, ut mirandi finem nullum faciam: ità suspicio, ut quod anno abhinc tertio ex hoc ambone dixi, Scholasticæ Theologiæ Primorum Principem sapientiâ maximum, ac vitæ sanctitate adhuc majorem, & perpetuò sentiam & identidem profitear: ità demum laudandum ac celebrandum jam tum suscepi Divum Thomam, ut ab eo quâ par est commendatione celebrando nunquam vel mihi, vel ulli Theologorum cessandum esse putem. Quare siquid in laudibus Angelici Doctoris pertexendis deliquero; id ità iri acceptum ab unoquoque vestrùm confido, ut me aut culpâ omni vacare; aut pietatis & sancti officii studio peccâsse dicatis: quorum utrumque Doctori Angelico honorificum, & neutrum indecorum erit Oratori. Ut ut est, tempus monuit, ut quo possem linguæ obsequio pro Thoma starem primum anno æræ Christianæ millesimo septingentesimo vicesimo tertio; nempe quadringentesimo, ex quo Joannes XXII. Pontifex Maximus cœ-



lestes honores Aquinati decrevit, & solemnī ritu viri sanctissimi memoriam consecravīt. Et geminandis laudibus sua hodie tempestivitas est, quod natus est Thomas anno seculi Christiani tertii decimi vicesimo quinto: quod anno ætatis vicesimo quinto Philosophos & Theologos summā omnium approbatione & plausu interpretatus est: quod exinde in annum usque vicesimum quintum in arduo docendi scribendique munere defudavit. Igitur tam annus à natali Doctoris Aquinatis quingentesimus, quàm anni vicesimi quinti epocha tertium geminata, suo velut prærogativo omine allicit vespigalem tanto Doctori eloquentiam, & ad laudes ejus palam & magnificè expromendas hortatur. Quod si olim ludi seculares centesimo quoque anno dabantur pompā ingenti, apparatu splendidissimo, celebritate maximā, sumptuum profusione incredibili: an tam tenax silentii erit Orator, ut tanti Doctoris anniversariam memoriam, & annum quintum secularem Panegyrico debito defraudet? Quid quod & annus quisque centesimus, qualem ab Ortu Thomæ quintum nunc agimus: & quinquagesimus, in quem usque sanctissima Thomæ vita se exporrexīt: & quintus ac vicesimus, quem Thomas publicæ Philosophicarum & Theologicarum disciplinarum professionis auspicem habuit, anni jubilei sunt singuli: & vel ideo anno hoc Jubileo, qui Christiano Orbi faustissimus illuxit, quantum consequi poterunt Oratores disertissimi, omnibus & ingenii & eloquentiæ viribus Thomam celebrari monent. Quanquam quid ego temporum periodis circumscribo Thomæ merita? quid tempori velut admetior? tempori, quod non tam fluit quàm diffluit, sic oritur ut simul moriatur: merita citra hyperbolam immortalia: merita Thomæ, qui & virtutum omnium absolutissimam ideam in se expingens, & sapientissimo calamo divina mysteria exscribens æternitati laboravit. An igitur immortalia Thomæ merita laudibus exornabo? sed hæc cum infinita sint, definitā angustis limitibus facundiā commendari non possunt. Equidem non omnia Thomæ merita commendare institui, quod & illorum mole opprimerer, & tempore excluderer: nec sanctitatem pariter & sapientiam Thomæ celebrandam oratione suscepi, quod laudans utramque, neutram pro dignitate laudarem. Et magnopere vereor, nè sub maiestate incredibilis sapientiæ, quæ sola me hodie laudatorem habebit, fatiscat oratio. Reperi tamen quo & meæ Oratoris tenuitati consulerem, & Thomam prædicarem tanto autore, quantum vel retulisse, Thomam magnificentissimè laudasse sit. Nec enim altius eluctari Suada potest, quàm si Verbi divini  
facun-



facundiæ jungatur: nec illustrior laus cogitari, quàm quæ à cælo syllaba-  
tim dictata sit. Quod tum me optimo consilio, atque ex prudentiæ le-  
gibus fecisse dicetis, cùm ego altiùs dicendo provectus laudationis meæ  
testem, autorem, & sponsores Deum sistam: idque demum conficiam,  
maximam fuisse Thomæ sapientiam, cui maxima merces, penè divinam,  
cui merces DEUS repensa sit. Quocirca ut mecum ex præmio pre-  
tium tam admirabilis quàm singularis illius sapientiæ penitiùs cognosca-  
tis, Verbi divini & Thomæ Prædicatores sapientissimi: adeste non tam  
animis quàm benevolentia, & in altum laudum Aquinaticarum prove-  
henti orationis cymbam, benignitatis vestræ favonio aspirate. Vos quo-  
que, Auditores spectatissimi, vultis sapientiæ hujus præstantiam per-  
nòsse? ex fructu & mercede mecum æstimate. Vultis mercedem & fru-  
ctum cognoscere? dum dico attendite, dum attenditis favete. Patien-  
tia vestra mihi vela & antennæ, favor secundi venti, silentium celeusma  
erit.

Annus à nata in tempore aterna Sapientia seculi supra decimum-  
tertii vicesimus quintus Thomam illustrissimis natalibus Orbi dedit Co-  
mitem: annus Thomæ inter mortales agentis vicesimus quintus Tho-  
mam Orbi dedit Sapientum ducem ac Principem. Annus profectò Orbi  
universo auspicatus, & quem Jubileum jure dixerim. Tum ille Bos  
eatenus mutus oppeffulati oris laxavit ostium: tum quidquid in subli-  
miores scientias peccabatur, convulsum ibat: tum velut reclusâ portâ  
scientiarum aureâ, mentis suæ thesauros quaquaversum diffudit. Si hoc  
initio, tam illustri ac splendido, ad docendas severiores disciplinas ag-  
gressus est Thomas: si novitium Professore communis omnium appro-  
batio & plausus secutus est: si juveni veterani & rude donati Doctores  
assurgebant: si ejus Schola, ceu quondam Apollinis templum pro refe-  
rendis oraculis frequentata: si literis redire honos & increfcere, si ve-  
ritas comptiore ornatu & lætitiis omnibus incedere, fugari ignorantia  
caligo, lux & splendor Theologiæ, Academia totinova eaque venustis-  
sima facies ipso statim professorii muneris principio induci: quæ erit elo-  
quendi vis, quæ copia & facultas dicendi, quæ non dicam eleganter ac  
copiose, sed simplici narratione exponat, quousque sapientia Thomæ se  
deinceps extulerit, ad quod fastigium quotidianis progressibus per ipsos  
annos quatuor ac viginti ascenderit: quâ nominis sui gloriâ, Reipubli-  
cæ literariæ fructu, Ecclesiæ totius emolumento, vitam omnem docen-  
do, scribendo, concionando exegerit. Non percenseo laudum præ-  
stan-



stantissimarum titulos, quibus ob sapientiæ magnitudinem divinæ voluntatis interpres, Præceptor Angelicus, lingua fidei, Christianæ legis tutor, religionis census, errorum naufragium, & felix veritatis assertio audiebat. Non reduco ad calculum monumentorum scriptorum numerum, varietatem, præstantiam; etsi hæc sint Reginae Theologiæ instructissima horrea, publica veritatis armamentaria, inexhausta orthodoxæ Ecclesiæ panoplia. Non tento denique meis auspiciis magnificentissimam Thomæ commendationem, quod audax sanè molimen sit hominem laudes Angeli conari. Christus hodie pro me loquitur, qui olim locutus est pro Thoma. Et ejus succincta oratio immensus Thomæ pannyricus est. Planè prolixa laudatio est, cum DEUS laudat vel diverbio. Commendavit Christus divino testimonio Scriptum Thomæ: mercedem quam vellet, quam eligeret, obtulit: hoc est, dicto juxta ac facto sapientiam Præceptoris Angelici super omnem omnis doctrinæ severioris majestatem extulit. Felix liber, cujus probator ac præco DEUS est: ingens & omnem hominum doctrinam supergressa sapientia, cui DEUS merces, ac redhostimentum est. Quàm singularis hæc merces Thomæ sit quò palàm faciam, expendendum est, quomodo Abraham cum Thoma communis sit: Thomam enim Patriarchæ tanto conferam ut præferam. *Magnus planè vir Abraham - - quem votis suis Philosophia non potuit æquare:* (1.) Magnus, quin maximus Thomas, qui Theologiam se ipsâ majorem fecit, & Theologos omnes se ipso minores. Prorsus id ipsum dixit DEUS Thomæ, quod dixit olim Abraham. *Ego protector tuus sum, & merces tua magna nimis.* (2.) Pergeret hinc secundo cursu Oratio, nisi hunc responsum Abraham sufflaminaret. *Domine DEUS,* ait, *quid dabis mihi? ego vadam absque liberis.* Mira sententia, responsio paradoxa: quasi mercedem sibi nullam tributum iri Patriarcha existimet, nisi filii tribuantur: nec suam fidem liberaturus sit DEUS, nisi datis liberis. *Quid dabis mihi? ego vadam absque liberis.* Igitur necesse est statuere, jam tum DEUM fuisse mercedem Patriarchæ, cum risum fecit Saræ, & Isaac filium dedit Abraham. Quid filium dico? subjungam oportet, quod subjunxit DEUS. *Suspice cælum, & numera stellas, si potes. -- Sic erit semen tuum.* Tantos dedit DEUS filios Thomæ, ut Pater excelsus: tot dedit, ut Pater multitudinis veridico cognomento dici mereatur. Numera filios, quos Thomæ sapientia Ecclesiæ genuit, & in Doctorum myriadas incidisti: numera Doctores Thomæ discipulos, & stellas numerasti. Nihil humile cogitare fas est de Thomæ filiis: Angelici Præceptoris discipuli non

(1.) S. Ambros. de Abraham libr. 1. cap. 2. (2.) Genes. 15. 1.



non sunt recensendi in terra: *Suspice cælum*; Scilicet quos nascendi conditio in terris collocavit, sapientia & eruditio cœlis infixit stellas minimè erraticas. Neque enim stellarum nomen tam aptè & luculentè convenire quis arbitretur filiis Abrahami, quàm illud nervosè ac propriè Doctoribus Thomæ filiis tribuatur. Nisi enim magnopere falli me contingat, numerum ibi Deus indicatum voluit, cùm Patriarcham affatus dixit, *Numeras stellas*; non splendorem & dignitatem, istis quidem verbis, ivit explicatum. Id quod ego ex sacrarum Literarum loco planè gemino intelligere ac demonstrare mihi videor. Nunquid enim Abrahæ jam antè pollicitatione sanctissimâ hac verborum formâ illud ipsum affirmavit Deus: *Faciam semen tuum sicut pulverem terræ.* (3.) Nunquid ipsum illud promissione repetitâ Abrahæ confirmavit: *Benedicam tibi, & multiplicabo semen tuum sicut stellas cœli, & velut arenam, quæ est in littore maris.* (4.) Eritne aliquis qui cùm pulverem terræ, cùm arenam maris nominatam audiet, excelsum ac eminens quidpiam præter numerum esse significatum ausit affirmare? Itaque Patri multitudinis hîc soboles innumerabilis promittitur, non verò sobolis dignitas & claritudo ostenditur. Approbavi vobis, ut non vanè arbitror, Auditores, mentem meam; sed necdum mihi, nisi & hoc adjecero. Plures Abrahæ erant filii, unus ex Agare, multi ex Cethura: sed non erant semen, quod peculiaribus prærogativis cumlaret DEUS. *Isaac vocabitur tibi semen.* (5.) Isaacum excipit Jacob. Hic demum multæ prolis pater duodecim filios, & in filiis duodecim tribus totidem gignit: homines qui terram implerent, numerum omnem excederent. Quot hîc stellas computabimus in numero hominum penè infinito, si quotquot sunt Abrahæ posterî, tot stellas esse putabimus? Ego verò ex omni Abramidarum numero non nisi stellam unam in toto sacrarum Paginarum recensu invenire mihi videor. Sic enim habent canonici Numeri: *Orietur, inquit, stella ex Jacob.* (6.) Ecce stellam, non stellas. Hæc nimirum laus vobis Thomæ filiis debebatur, Patres Admodum Reverendi, quos hodie laudibus post Thomam in cœlum efferò, non tam pietate, quâ in vos feror, meâ; quàm Divini testimonii, quo trahor, auctoritate. Accumulabo enim Divinarum Scripturarum oracula, quèd perinde turpe sit Theologum non allatis in medium sacris Paginis loqui, ac Jurisconsultum sinè legum ac Canonum Scitis sermocinari. Jam verò quàm illustre in rem meam, quàm splendidum pro dignitate vestra illud est Danielis? Nam advertite animum. *Qui docti fuerint, fulgebunt quasi splendor firmamenti: & qui ad justitiam erudiunt multos, quasi stellæ in*

(3) Genes. 13. 16. (4) Ibid. c. 22. 17. (5) Genes. 21. 12. (6) Numer. 24. 17.



*perpetuas aeternitates.* (7.) Felices Thomæ discipulos, quibus doctrinæ splendorem tantum nè odium quidem ipsum negaverit: livor etiam videre se profitetur, dum invidet. Iterum iterumque felices Thomæ filios, qui erudiendis ad justitiam mortalium plurimis stellarum nomen ac claritatem suo jure sunt consecuti. Neque tamen usqueadeò prodigus in laudandis vobis, nec tantopere parcus in commendando Thoma vestro ero, Patres Religiosissimi, ut unos solos vos Thomæ filios ac discipulos faciam: nec Thomam omnium omnino Theologorum Patrem ac Magistrum statuam. Sanè ille solus Thoma Magistro non gloriatur, ille se ex ejus doctrina profecisse neget, qui aut extra Theologorum censum, aut extra Ecclesiæ sinum est. Est certè quòd Theologis omnibus grater, mihi gaudeam, quo meritò sanctissimus Ordo vester gloriatur. Sed vae vobis proles adulteræ & spuria genimina, homines sequioris doctrinæ & damnatorum dogmatum assertores, qui gravissimâ & nunquam satis detestandâ injuriâ Thomam ducem ac patrem mentimini. Nobilissimus ille, vos nullius numeri: ille pius Ecclesiæ Matris filius, vos viperæ: ille apprime Catholicus, vos Jansenii Iprensis proles, vos Arnaldi progenies, vos Quesnelli abortus. An vos Ecclesiam fallere? illi vos tenebrosis artibus imponere, quam Spiritus veritatis regit ac illustrat? Proh pestis! proh tortuosi serpentis satus! pro scelera in ipsa Ecclesiæ viscera quòd tectius eò immaniùs grassantia! Novit hos Gyges Ecclesia, & dudum sacris diris devotos semper omni detestatione execrabitur. Nec enim fallit anulus errare nesciam; quantumvis sic obvertant palam, ut celent Jansenium, & damnatissimo mendacio ostendant Thomam & Augustinum. Non est perfugium consceleratissimæ factioni ad Sanctorum adyta: non tutela, non præsidium in genuinis Augustini & Thomæ placitis, quorum verba ceu maligna echo truncata reddunt, non integra: in neutrius luce tenebrionibus ullis latere conceditur. Sed à noctuis ad aquilas, à terræ filiis ad filios Thomæ, à cæno ad cælum, à quisquiliis his ad stellas revertamur. Suspiciat jam cælum uterque Abraham: ubi vetus ille stellarum typo expressam leget filiorum suorum multitudinem; ibi novus non asteriscis, sed grandibus astris notatum leget filiorum suorum & numerum, & splendorem. Ergo confeci quod volui, Auditores, ac velut ante oculos vestros statui Thomæ filios: & simul harum stellarum numerum innummerum, simul splendorem illustrissimum indigitavi. Neminem quidem omnium Theologorum cum Thomæ splendore compono, quòd Sol ille solus sit: neminem Thomæ parem statuo, quòd meâ sententiâ hujus unius

An-



Angeli species in plures multiplicari non possit. Satis tamen mihi superque est, Auditores, quasi obtutibus vestris stitisse Thomæ discipulos, Orbis Magistros; commonstrasse stellas doctrinarum face fulgentissimas, numero infinitas. Quis enim supputus eos capiat? quis inconnivis oculis eorum lumen speculetur, qui replent Scriptorum omnium monumenta, famam, æternitatem? *Quasi stellæ in perpetuas æternitates.* Immorarer his diutiùs, si ea obscura cuiquam esse possent: enumerarem primæ magnitudinis stellas, nisi aspectabiles omnibus magis suspici mererentur, quàm dici. Non committam igitur, ut in hoc amplissimarum laudum mare evehar: quando hìc exitum difficiliùs reperire est quàm ingressum; & angustus orationis modus tot tantorùmque virorum encomiis imparem se fateatur est necesse. Quis enim vel te solum dignâ laudatione prosequi possit BENEDICTE XIII. Pont. Max. quem Principem nasci dedit avita Celsissimæ URSINÆ DOMÛS claritas: quem Christi & Thomæ sectatorem fecit rerum caducarum omnium despicientia, & religiosissimæ vitæ ac scientiarum studium: quem Principem Ecclesiæ Cardinalem jussit virtus & sapientia: quem Archiepiscopum Beneventanum legit rerum gerendarum longo usu firmata prudentia, vigilantia, divinæ gloriæ & animarum zelus: quem denique in Petri Cathedram, fastigium illud terris altius & cœlo caput inserens, sublimârunt & immortalia merita, & populorum vota, & Spiritûs Sancti suffragium; qui cùm vitam sanctissimè ageres, sanxit ut publicâ etiam Ecclesiæ voce, maximo Orbis totius & vicario Deitatis Magistratu Sanctissimus audires. Laborabant secula quàm diu, tam non frustrâ, ut talem te tantùmque Pontificem parerent: laborabunt secula ventura omnia, & frustrâ laborabunt, ut commeritis te præconiis exornent. Et tuas ego laudes moliar? audeam ego ire per laudes Thomæ sequacium plurium? per encomia singulorum? Ast ipsi laus sua & magnifica prædicatio sunt Thomæ filii, ipsi laudum perpetuarum mundo materies, ipsi splendoribus Thomæ illustres sunt, in cujus augustissimo lumine aplicantur. Et bene felicitèrque cecidit quòd Sol iste Theologiæ stellas illas, innumeros satellites ejus & perpetuos comites ajo, lucis suæ magnitudine oculis nostris adeò non subtraxerit, ut quantò propiùs hunc splendoris fontem circumfistunt, tantò illustriùs ad miraculum usque inclarescant. Habemus itaque Thomam filiorum suorum, cum primis domesticorum in ejus verba jurantium, immensam gloriam: habemus filios luculentissimam Thomæ mercedem. Nescio tamen quâ fiat, ut his, quæ prolixè non tamen abs re dice-

D

bam,



bam, ipse minimè acquiescam. Et verò Rex Psalter aliam omnem mihi cogitationem indere videtur. Quàm illustris, tam intricatus, mihi quidem, locus ejus occurrit: nec sat scio, an ex eo me expediam. *Ecce, ait, hereditas Domini, filii: merces, fructus ventris.* (8.) Non putem equidem puram putam, & mysterii vacuam synonymiam his vocibus contineri. Nempe parciora verborum sunt divina monumenta, cum mysteriis nullo non loco abundant. An in hanc cogitationem rectè veniam, ipsi judicate: nihil enim ego temere affirmabo. *Ecce hereditas Domini, filii.* Thomæ filios velut hereditatem suam vendicat sibi DEUS: hi sunt peculiaris ejus populus, sunt Domini gloria, quam alteri non dabit. Quod si ita est, ut sanè est; nolim ut ditem Thomam, hereditatem Domini Domino abjudicare. Sed quænam tandem merces Thomam manet? in patulo est: *Merces, fructus ventris.* Ergone cum filium unum petat, & unico triumphet Abraham Patriarcha Hebræorum, etiam unicum filium unicè petat Patriarcha Theologorum? Dicerem, Auditores, liberè, si satis constitutum haberem quid sentiam: & satis promptum esset effari, quod subit animum. Instituto tamen erotemati aut affirmatè respondeo, aut propior sum affirmanti. Sed quousque me abripiat æstus commendandi Doctoris Angelici, non maturè planè mecum exegi, qui filium peti ab Angelo somniavi veriùs quàm judicavi. Sit licèt Thomas compage carneâ, in carne tamen est Angelus, & alios liberos nescit quàm libros. Et jure de hac Intelligentia tritum illud intelligo, *Nihil desiderare de seculo potest, qui seculo major est.* Semper ille mundum exosus lubricas ejus illecebras procul relegavit, & rebellem concupiscentiam titione, ceu victrici clavâ debellavit. Verbo dicam. Intelligentiarum partus *Verbum mentis* est, non *Fructus ventris.* Quò igitur vertar? quid peti dicam à Doctore Angelico? quando dudum, quidquid temporaneum est & vicissitudini obnoxium, averfatione pulcherrimâ dedignatus projecit. Si per vos licet, & licet scio, Auditores; dicam quod in mentem venit, & hîc loci ac temporis expromi apud vos tam debet quàm potest. Filium postulat Thomas, sed Deum: Homo-Angelus Deum - Hominem votis omnibus ardet indipisci. Hanc sibi laborum omnium unam mercedem poscit. Sic quidem statuo. At necdum mihi Abrahamus excidit: & juvat de eo paulisper loqui, quò aptiùs loquar de Thoma. Isaacum poscit Abraham, & in Isaaco JESUM. Si autore hujus sententiæ opus est, unum in rem præsentem adduco Ambrosium; hoc est multos in uno, ut qui pro nube testium est. Sic autem inquit. *Per Isaac possumus intelligere Dominum JESUM, quem in principio*



*Evangelii secundum Matthæum Abrahamæ filium legimus.* (9.) JESum igitur petit Abraham, JESum Thomas. En ut planè liqueat, quàm bellè Aquinatem inter & Abrahamum conveniat. Redeo in viam & orbitam. *Verbum mentis* petit Angelus noster; sed Verbum æternum, sed Verbum mentis divinæ. *Fructum ventris* petit; sed *Benedictum fructum ventris* immaculatæ Deiparæ. O votum felix! ô petitionem Sapientum Antesignano dignam! ô præstantissimum desideriorum centrum, præ quo meritò contempsisti universa Doctor sapientissime. Infudit tibi mundus nobilissimum avitæ stirpis sanguinem? despexisti, ut qui alio non gloriareris sanguine, quam quo lotus es à Salvatore. Obtulit suas caro illecebras? repudiasti etiam innocentes, ut cui unice in deliciis esset *Verbum caro factum*. Ipse te honor tui candidatus obtrusis quæ sacris quæ profanis fascibus negotiosissimè ambivit? effugisti etiam insequentem, ut qui honoris fastigium duceres abjici, & contemni cum Christo. Ipsa sapientiæ celebritas nomen tuum juxtà ac doctrinam altissimè efferebat? non potuit animum; qui tantam hausit sapientiam ex libro humilis Crucifixi. Quin jam unà mecum Auditores admirabundi aspiciatis Crucifixi discipulum, quæ Orbis magistrū mecum suspexistis. Nunc enim vertenda theatri facies, & alia pompa inducenda. Videte Thomā; ut Crucis cathedræ adgeniculatur: ut pendentis è cruce Redemptoris lateri propinquat ore, & inde fugit divina mysteria, unde fluxerunt Sacramenta. Videte in preces manus erectas, quasi illis caperet arcana cœlestia, quibus scriberet. Videte in uno Deo defixos oculos, tanquam averfatores terræ, patientes divinorum. Videte aures arrectas ad eloquia Domini, surdas ad strepitum negotiorum terrenorum. Imò audite, quod ipsæ ex Christo cruci affixo audiunt. Audite, & stupete. *Bene scripsisti de me Thoma. Quam ergo mercedem accipies?* (10.) O vocem mirificam! ô commendationem obstupescendam! Quid hîc primū mirabimur, Auditores? an quod scripturam Thomæ probet Christus, qui character est Patris? an quod Thomæ amplissimæ & quantælibet mercedis fit optio? Enimverò magnum est, quod operi Thomæ idem hîc elogium quod operi ipsius DEI tribuitur. Vidit Deus opus suum quod condidit, & vidit quod esset bonū. Vidit opus quod Thomas condidit, & vidit quod esset bonū. Ecce disparis operis par conditio, quia laus non impar. Magnum profectò est hoc, & præcipuâ admiratione dignum; necdum tamen est illud, quod dicturio. Audite enim. Vidit Deus opus suum, & benedixit: vidit opus Thomæ, & dixit *Bene*. Parū abest ut dicam, nisi sobriam sententiam

(9.) *Ambros. de Abrah. l. 1. in c. 15. Genes. (10.) Breviar. Rom. 7. Martii. Guilielm. quis  
Tbeco in Vita S. Thomæ cap. 6. & 9.*



quis in malam partem accipiat; plus laudis impendit Deus operi Thomæ quàm suo. Recognoscamus quæ diximus. Vidit DEUS opus suum, & per Moysen scripsit, quòd esset *bonum*: vidit Scriptum Thomæ, & dixit, quòd scriptum esset *bene*. Nimirum simplex laudatio est, quæ Scriptum esse bonum asserit: laus duplex est, quæ Scriptum non duntaxat *bonum*, sed & bene scriptum esse confirmat. Quòd si quis erit, qui hæc magnificè magis quàm verè dici contendat, nihil repugnabo; etsi & hoc non rectè minùs quàm splendide possem adjicere: Opus Dei à Deo est ex nihilo: Opus Thomæ de Deo & ex Deo est. Dicat hìc non nemo: Opus Dei ex nihilo miraculum est. Est sanè, quis abnuat? sed & Thomæ opus perpetuum quoddam & merum miraculum est. Tot miracula patravit Thomas, quot Quæstiones determinavit. Non mea hæc, quanquam & mea; sed Joannis XXII. Pont. Max. ex Vaticano Oraculo sententia est. At illud omni asseveratione affirmabo, singulare encomii genus esse, *Bene scripsisti*; nec ulli post natos homines cum Thoma commune. Equidem in Scripturis sacris lego semel atque iterum, *Bene omnia sunt locuti*. (11.) Lego, *Bene egistis*. (12.) Lego dictum à Christo, *Bene dixisti*. (13.) Lego denique, ut mittam alia, *Bene facitis scribentes*. (14.) Sed nullibi legere est in verbo DEI hoc cuiquam datum esse elogium: *Bene scripsisti*. Adcò loquitur quædam Verbum Deus, quæ non loquitur verbum Dei. Quorsum hæc? nisi ut maximam Thomæ sapientiam fuisse persuadeamur, cui sanctissimâ testificatione Deus ipse suffragatur. Absint testes, absint tabulæ, absint Thomæ volumina sapientiam sui conditoris ipsis solariis radiis expingentia, absint Pontificum summorum effata; nihil his opus est: plus dicit Christi una vox *Bene*. Ipse dixit: ità probatum, peroratum, persuasum est. Ipse dixit: nec potuisset dicere *Bene*, si Thomas non scripsisset bene. Non fallit quod dicitur, dum falli non potest qui loquitur. Silete linguæ, dum Deus loquitur: taceant panegyrici, ubi Deus panegyristes est. Imò verò voci divinæ consonante voces hominum, & quam laudem præivit Christus, repetitote: Bene scripsit de Christo Thomas, bene scripsit. *Exceptit doctrinam Domini, & qui vigilaverint ad illum, invenient benedictionem*. (15.) Plus doctrinæ excepit ex uno libro Crucifixi Domini Thomas Angelicus, quàm excerpserit ex libris omnibus. Plus precibus ad Deū fuis quàm studio didici; Thomas dixit: (16.) *Vigilavit ad Deum crucifixum intempestæ noctis silentio; Acta ejus & testes dicunt. Et invenit benedictionem: dum Bene scripsisti*, Christus dixit. *Dicite proinde, Dicite iusto, quoniam bene: quoniam fructum adin-*

(11.) Deuterom. 5. v. 28. & cap. 18. v. 17. (12.) Judic. 9. v. 16. (13.) Joann. 4. v. 17. Ven-  
 (14.) 1. Machab. 12. v. 22, (15.) Eccli. 32, 18. (16.) Breviar. Rom. & Processus Neapol. cap. 7.



*ventionum suarum comedit.* (17.) Quæretis fortasse Auditores, quis Thomæ fructus, quæ adinventio sit? Dicam, vel si non quærat. Exorta erat Lutetia Parinorum in principe illa Orbis Academia perdifficilis quæstio, & acerrimis disputationibus ventilata. Implectebantur difficultates in nodum Gordium, quem quò studiosius explicare niterentur viri sapientissimi, ampliùs implicabant. Et quæstio erat, de dimensionibus corporis Christi; & quî fieret ut panis in Eucharistia non esset, accidentia tamen sinè subjecta substantia, post transubstantiationem salva persisterent? Credebant quidem hæc viri apprimè Catholici; sed quomodo ab Aristotelis & Arabum Philosophorum objectionibus, adhæc naturæ Omnipotentia Dei usquè obluçantis paralogismis defenderent, non pervidebant. Consulitur itaque Thomas. Accipit provinciam, & precibus consulit Dominum. Sub has dat se labori bene auspicatò: conficit Scriptum, & Gordio extricato perficit. Tum nocte concubiâ quid censuisset ipse, quid scripsisset, Crucifixo Salvatori censendum offert. Orat divinam sententiam, & exorat. Approbatur Scriptum Thomæ, & divinæ vocis calamo subscribitur: *Bene scripsisti de me Thoma.* (18.) Sed quid tam diu demiramur testificationem Christi, & demoramur; nec transimus ad demirandum mercedem & fructum Thomæ Christum. *Dicite iusto, quoniam bene: quoniam fructum adinventionum suarum comedit.* Adinventio Thomæ adinventio veritatis est, evolutio nodosarum difficultatum, explicatio sanctissimi Eucharistiæ Sacramenti uberrima. Pro Christo laboravit Thomas; Christum igitur habeat mercedem. Habeat benedictum fructum ventris: & eo, quem ad Aras comedit indies in via, æternum perfruatur beatissimus in patria. Et verò Christum petiit, Christum obtinuit. Certè enim quantæcunque demum mercedis Thomæ fit optio: *Bene scripsisti de me Thoma.* *Quam ergo mercedem accipies?* Et Deum Thomas optavit mercedem: *Non aliam Domine, nisi te ipsum.* Sicut mercedem optare non potuit majorem, ita minorem non debuit. Nec sapiens fuisset Thomas, si aliud petiisset, quàm Deum: nec optationem daturus DEUS, nisi non aliam mercedem optaturum præscisset quàm Deum. O verè munificentissimum Deum, qui dedit optationem rerum omnium! ô certè sapientissimum Thomam, qui optavit unum, sed Optimum. Sed hoc adeò non singulare, nec Aquinati proprium esse dicetis, Auditores, ut iustis & Sanctis omnibus cum Thoma commune sit. *Dicite iusto, quoniam bene.* Hæc merces Abrahamæ promittitur, & cum illi, tum omnibus cœli incolis exhibetur. Ergo ruunt, ajetis, quæ

E

tanto



tanto molimine superstruximus, postquam fundamentum infirmum & caducum jecimus. Atqui non ita est. Stat orationis moles basi suâ: nec nutat, nec labat. Quid ita? Dicam paucis. Aliis DEUS hereditas solum est, ut beatis infantibus: aliis hereditas & merces, sed impetrata est. Thomæ DEUS merces non impetrata, sed electa est. *Quam ergo mercedem accipies?* Ut quid enim Thomæ merces quantalibet eligenda deferretur, nisi ut Deus merces eligeretur? Sed majus est, quod dicturus sum: imò nunc dico. Videlicet Sanctis omnibus Deus merces est, quod bene vixerint; Thomæ, quod bene scripserit. Ecce enim autorem pronuntiati mei Deum. *Bene scripsisti de me Thoma. Quam ergo mercedem accipies?* Nihil addo, quod res liquidò jam probata, & minimè obscura est. Istud autem, ut Thomæ Doctores laudibus geminandis ipsimet superjiciatis, Auditores, indictum mihi, vobis dicendum relinquo. Deductis in beatas illas sedes coloniis Deus una merces fit, quod bene vixerint: Thomæ Deus geminata merces fit, quod bene vixerit, & bene scripserit. Hoc si quis singulare & uni Thomæ proprium esse inficietur; edicat, cui omnium sanctissimorum virorum, cui omnium Angelorum aut hominum unquam dixerit Deus, *Bene scripsisti. Quam ergo mercedem accipies?* Dum hoc monstretur, & monstrabitur nunquam, non muto, non retracto, sed repeto sententiam. Aliorum vitæ merces Deus redditur; sed Thomæ Angelico fit Deus merces & vitæ & sapientiæ. Non enim vereor, ut nè nimius in Præceptoris quàm communis tam singularis laudibus sim, quem nemo satis laudaverit. Nec si profusior in eo laudando forem, succenserent Oratori beatissimi Cœlites, ut in quos non cadit invidia: nec caderet injuria, quod id duntaxat dicere me arbitror, quod Deum his ipsis verbis dixisse existimo, *Bene scripsisti. Quam ergo mercedem accipies?* An verò hic laudum sapientiæ Aquinaticæ finis? hic apex? hoc fastigium est? Non sanè. Utique parvus in encomia Thomæ sapientiæ fuit, qui minùs bene scripsit: *Pervenit ad summum Summa Thomæ.* Grandius elogium est: *Pervenit ad summum vel tantillum Scriptum Thomæ: Scriptum*, in quo patet DEUS Eucharisticus, qui latet sub velo accidentium: *Scriptum*, quod non improbet nisi atheus, postquam probavit Deus: *Scriptum summum*, quod Deum habere meruit & summum arbitrum & mercedem summam. Quid hoc miraculi est? Non vastum volumen, sed commentariolum; non codicem, sed planè codicillum offert Thomas Deo: & refert mercedem Deum. An dicam? vel tota sapientia Thomæ in exili opusculo est, cui merces Deus totus redditur: vel certè tanta,

*Dmy Prof. Jac. Had. Barb*



ta, ut Deo, hoc est, mercede summâ remunerari mereatur. An dicam ? vel opus summum hæc opella est, vel summa merces non probè admensa est opellæ. Conferamus mercedem sapientiæ, & sapientiam mercedi; sed sobriè. Non enim tam dementes sumus, ut eodem loco & pretio Deum & Thomæ sapientiam habeamus. Absit ut hoc vel cogitet Christianus Theologus, quod vel Philosophus Ethnicus reprehendat. Quærit Aristoteles (19.) cur veteres sua quidem Gymnicis certaminibus præmia constituerint, nullum verò sapientiæ decreverint. Et causam insinuat tergeminam, duas quidem ad institutum nostrum attinentes. Primum in hanc sententiam ait. Si pro præmio certandum esset sapientibus, quibus arbitris certaretur ? quinam uni adjudicarent victoriam & præmium, aliis omnibus abjudicarent ? An pari sapientiâ homines federent Judices ? an majore ? sed his utrisque statuta præmia, utrisque concertandum esset; nec qui minùs saperent, idonei judices esse possent: in Gymnasticis autem concertationibus idoneè judicat, quisquis de populo assidet. Tum subjicit: *Præmium præstantius suo certamine esse decet: itaque certaminum Gymnicorum præmium optatius & præstantius quàm ipsa concertatio est. Prudentiâ verò & sapientiâ quodnam præmium majus esse possit?* sic ille. Contrâ præmium decrevit Thomæ sapientiæ, qui unus potuit Deus: ipse spectator, ipse testis, ipse arbiter, ipse agonothesa. *Bene scripsisti de me Thoma. Quam ergo mercedem accipies?* An minorem ? an sapientiæ tuæ comparem ? Neutiquam: sapientiæ præmium sapientiâ præstantius esse debet. Igitur mercedem majorem consequeris ? imò verò maximam: *Non aliam Domine, nisi te ipsum.* Res paradoxa, sed vera. Ut probè admensum sit corpus corpori, moles moli, tempus tempori; utrisque eadem dimensio conveniat opus est; ut sapientiæ suum admensum sit præmium, sapientia præmio minor, præmium contrâ sapientiâ majus sit, oportet. Sic admetitur Deus mercedem Thomæ; sed liberaliter, sed profusè: nec dignum sapientiâ ejus præmium reddere se putat, nisi reddat maximum: & muneretur se ipso, se toto, se optimo æternum possidendo. Sic, ut majus præmium reddatur sapientiæ, vulgaris & ordinarius canon est: quòd Thomæ sapientiæ præmium repræsentetur maximum, facit sapientiæ magnitudo singularis; & remuneratorium Thomæ privilegium est.

Perorabo Auditores. Neceffe enim est ibi commendandi Thomæ finem facere, ubi fecit Christus. Quod unum restat, supremis verbis unâ mecum *Dicite justo, quoniam bene*: quia bene vixit; quod Thomæ cum

maxi-



maximis Sanctis commune est. Dicite Sapienti, quoniam bene: quia bene scripsit, & optimè elegit; quod Thomæ soli privatim proprium est. Maximi facite Thomæ sapientiam, quam vivæ vocis oraculo probavit Deus Maximus. Metimini Thomæ magnitudinem ex magnitudine sapientiæ: magnitudinem sapientiæ ex immensitate mercedis æstimate. Demiremini, quem imitari ex æquo nemo homo potest. Consectemini sapientiæ studium, etsi Thomam consequi non potestis: quem vel longo intervallo affectari præclarum est, dum assequi adynaton est. Nec tam ego vobis Thomam Magistrum præstituo; quam ejus vos condiscipulatu volo in Schola Christi crucifixi amplius nobilitari, ad justitiam plenius erudiri, ad amorem divinæ sapientiæ usquè inflammari, ad percipiendam denique mercedem sapientiæ Deum, Thomæ exemplo & provocari perpetim, & optimè comparari. At tu macte tantâ sapientiâ, & tanto præcone ac mercede oblatâ, electâ, possessâ macte Doctor Angelice, Pater excelse, Pater multitudinis Sapientum: proba & ama Oratorem tuum, qui ut Jesu Socium hac etiam re se probaret, cum Jesu te laudavit. Ut verò laudationem hanc immortalis gloriæ tuæ studiosissimam non probes, nihil subtimeo: nam quas laudes sapientiæ tuæ JESUS æterna Sapientia DIXIT, ego

D I C E B A M.

